

# La «JO» festivescha il 50avel

La Confederaziun ha entschiet a promover il sport d'affons e giuvenils igl onn 1972. L'organisaziun «Giuventetgna e sport» ei oz indispensabla per sustener uniuns e clubs e lur stentas d'intimar la giuventetgna da far sport. In motiv da festivar il giubileum.

Andreas Cadonau/FMR

La cefra ei impressiunonta. El cantun Grischun separticipeschan 25 000 affons e giuvenils ad ina ni l'autra purschida da Giuventetgna e sport (GS), la promoziun da sport a favur da giuvenils ed affons lantschada dalla Confederaziun avon 50 onns. Tier las disciplinas che han da bial'entschatta gudiu sustegn dalla promoziun federala saudan il ballapei, ir cun skis ni era il sport da muntogna. Per ils schefs dalla partiziun GS da diversas uniuns sportivas sursilvanas fuss ei buca pusseivel da poscher in program sportiv per affons e giuvenils senza sustegn dalla Confederaziun. Pli bia fadiga han ils caus da GS magari d'anflar menadras e trenaders. Pertgei sper il sustegn finanziel drova ei aunc adina la promptadad da sengaschar voluntariamein a favur dalla proxima generaziun. *David Berther*, schef GS dalla Secziun Terri dil Club alpin svizzer gi ch'ei «drova magari empau perschasiun da motivar in ni l'auter menader da Giuventetgna e sport». La proxima fin dalla jamna festivescha il cantun il giubileum da 50 onns GS el rom dil Gi dil sport grischun a Cuera, Tavau, Scuol e Tusaun. **Pagina 3**

## La «JO» – Ina historia da success

«Giuventetgna e sport» festivescha uonn il 50avel onn d'existenza. L'organisaziun naziunala ei in sustegn indispensabel per uniuns e clubs che promovon activitads sportivas da buca meins che 25 000 affons e giuvenils grischuns en 80 differentas disciplinas.

ANDREAS CADONAU/FMR

Avon 50 onns ha la Confederaziun lantschau il program da promoziun «Giuventetgna e sport» (GS) e dapi tschun decenn ei era il cantun Grischun dalla partida, sco quei ch'il menader dalla partiziun sport digl'Uffeci per la scola populara ed il sport, *Thierry Jeaneret* di. Partida ei la GS ni «igl JO», sco ella vegn era numnada en tiara romontscha, avon 50 onns cun 18 differentas disciplinas purschidas alla giuventetgna ella vegliadetgna da 14 entochen 20 onns. Ussa sedrezza la promoziun sportiva als affons ed alla giuventetgna da 5 entochen 20 onns. «Daferton cumpeggia il program da GS 80 diversas disciplinas.» Il Grischun porscha sez scolaziun a menadras e menaders da GS en 30 diversas disciplinas. «En las disciplinas meins frequentas purschin nus la scolaziun comunablamain cun auters cantuns.» Buca meins

che 25 000 affons grischuns separticipeschan onn per onn ad ina dallas disciplinas purschidas dad uniuns e clubs grischuns e sustenidas dil program federal GS. «Il program da promoziun Giuventetgna e sport ei ina historia da success.»

### Sustegn finanziel e lavur voluntaria

Il program da promoziun a favur dallas activitads sportivas dad affons e giuvenils sebase dad ina vart sil sustegn finanziel dalla Confederaziun e da l'autra vart era sin lavur voluntaria en clubs ed uniuns. Era sche biaras uniuns sportivas sesprovan da pagar ina mudesta indemnisaziun a lur menadras e menaders da GS. Sco per exempel l'Uniu sportiva Lumnezia, sco quei che *Gian Reto Derungs*, schef GS gi. Il sport da skis appartegn allas 18 disciplinas da partenza dalla GS, ed el ei aunc adina tschercaus tiels affons e giuvenils. «Nus sentin secapescha las midadas demograficas.» Tuttina separtici-

peschan ming'onn denter 40 e 50 affons lumnezians alla purschida da GS dalla Uniu sportiva Lumnezia. Activitads sportivas ch'entscheivan igl atun en halla da gimnastica per cuntinuar pli tard sin pista. *Gian Reto Derungs* gi che sedivertir sin pista seigi part dil program che plidenton denton era skiunzas e skiunzas che veglien separticipar a cursas da skis.

### Dapli mattatschas dattan ballapei

Entochen 180 affons e giuvenils fan part dalla partiziun da junioras e juniors dil Club da ballapei Schluoin/Glion. *Roland Casutt* coordinescha la sparta da juniors per quei club ed el tradescha che Schluoin/Glion hagi gia adina giu dabia affons e giuvenils prompts da giugar ballapei. «Novissimamein s'interesseschan dapli mattatschas per il ballapei.» Bein vegn la promoziun da juniors dil sport da ballapei purschida comunablamain dils clubs sursilvans naven dalla 5ava classa

da scola. Tuttina drova Schluoin/Glion denter 30 e 40 trenaders per tgamunar las diversas gruppas da junioras e juniors. Recrutar menaders e trenaders ei magari buc aschi sempel. «Jeu savess schon aunc duvrar in ni l'auter.» Buca sulet dapli mattatschas s'interesseschan per il ballapei, a *Roland Casutt* eis ei era reussiu da recrutar ina ni l'autra menadra e trenadra. «Nus essan secapescha interessai ch'ills trenaders frequentan la scolaziun da GS, sfurzar savein nus denton negin.»

### Sport da reiver

Interessents prompts da frequentar ils cuors da menadra e menader da GS ha *David Berther* atgnamein adina. La scolaziun ha in buna reputaziun ed ei perquei tschercada. Pli bia perschasiun drova il schef GS dalla Secziun Terri dil Club alpin svizzer da motivar menadras e menaders da star a disposiziun per tgamunar ils giuvenils els cuolms. Il sport da mun-

togna appartegn medemamein allas 18 disciplinas che la GS ha promoviu da bial'entschatta. «Nus purschin differentas activitads da stad ed unviern ad affons ella vegliadetgna da 10 entochen 14 onns e da 14 entochen 21 onns.» Malgrad ch'il sport da muntogna ha anflau dabia novs adherents el decuors dils onns vargai ei la partiziun da GS buc carschida marcant tier la Secziun Terri. «Igl interess dils affons e giuvenils ei denton semidaus e sedrezza plitost al reiver sportiv en halla ni els cuolms.»

Dependents da menadras e menaders ei era il schef GS dalla Uniu sportiva Lumnezia, *Gian Reto Derungs*. «Momentan essan nus ina ferma equipa cun 12 entochen 13 menadras e menaders.» Tenor sias experiencias eis ei impurtont da tgirar la collegialitad interna. E la pli-part da quellas menadras e da quels menaders han avon onns sez fatg part a «Giuventetgna e sport».



Avon 50 onns ha la Confederaziun entschiet a promover la giuventetgna sportiva.

FOTO MAO